



Broj: 02-04-1306/21-AP-3  
Datum: 26.05.2021. godine

OPĆINSKO VIJEĆE ZAVIDOVIĆI  
n/r PREDSEDAVAJUĆOJ OPĆINSKOG VIJEĆA  
mr. iur. Erna Merdić Smailhodžić

PREDMET: Odgovori na vijećnička pitanja sa 3. sjednice Općinskog vijeća Zavidovići održane 11.05.2021. godine, dostavljaju se

Povodom vijećničkih pitanja postavljenih na 3. sjednice Općinskog vijeća Zavidovići održanoj 11.05.2021. godine, dostavljamo odgovore na iste kako slijedi:

#### 1. VIJEĆNIČKO PITANJE VIJEĆNIKA HODŽIĆ HARISA

Vijećnik Hodžić Haris: Na osnovu članova 8. i 87. Poslovnika o radu Općinskog vijeća Zavidovići, kao vijećnik Općinskog vijeća Zavidovići postavljam sljedeće vijećničko pitanje: U kojoj proceduri je i da li je u 2021. godini planirana sanacija i rekonstrukcija lokalnog puta Imamovići-Pašin Konak?

Obrazloženje:

Mještani naseljenih mjesta Imamovići i Pašin Konak pokrenuli su projekat sanacije dijela lokalne ceste Imamovići-Pašin Konak. Do danas na ime ove akcije odazvalo se 220 mještana/učesnika u ukupnom iznosom od 26.505,00 KM.

Još u jesen 2020. godine mještani ovih naseljenih mjesta imali su obećane nadležne službe i načelnika da će se od strane općine Zavidovići izdvojiti značajna sredstva kako bi se zajedničkim snagama u saradnji sa mještanima izvršila rekonstrukcija relacije puta Imamovići-Pašin Konak.

Direktno pitanje: Da li je i kada planirana sanacija lokalne ceste Imamovići-Pašin Konak i da li mještani ovog kraja mogu računati na podršku općine Zavidovići u realizaciji pokrenutog projekta?

Od nadležnih zahtijevam jasne odgovore u pisanoj formi.

Vijećničko pitanje upućuje se nadležnim općinskim službama.  
S poštovanjem,

Odgovor na vijećničko pitanje (Odgovor je sačinjen na osnovu akta Službe za upravu ekonomskih poslova i poduzetništva, broj: 03-45-17-170/21 od 26.05.2021. godine): Planom javnih nabavki Općine Zavidovići za 2021. godinu planirana je javna nabavka pod nazivom „Nabavka radova investiciono održavanje i sanacija dijela lokalne ceste Zavidovići - Pašin

Konak“ u ukupnom iznosu od 50.000,00 KM. Ovom nabavkom planirana je sankcija dionice Hajderovići - Imamovići i ista će biti realizirana u zavisnosti od ostvarenih budžetskih prihoda, te će i mještani biti u mogućnosti realizovati vlastita prikupljena sredstva.

## 2. VIJEĆNIČKO PITANJE VIJEĆNIKA ŠIMŠIĆ IGORA

1. Vijećnik Šimšić Igor Na osnovu članova 8. i 87. Poslovnika o radu Općinskog vijeća Zavidovići, kao vijećnik Općinskog vijeća Zavidovići postavljam vijećničko pitanje koje se tiče potrebe informisanja OV-a i vijećnika, kao i građana o realizaciji pojedinih aktivnosti organa lokalne uprave. Vijećničko pitanje sadrži podpitanja kako slijedi:

S obzirom na odsustvo informacija i nepoznanice šire javnosti o realizaciji pojedinih aktivnosti Opštinskom načelniku i nadležnim općinskim službama upućuje se pitanja sa sljedećom predmetnom problematikom:

- Kada će u proceduru na sjednici Općinskog vijeća Zavidovići biti upućen i dostavljen Izvještaj o izvršenju Budžeta općine Zavidovići za period 01.10.-31.12.2020. godine (zadnji kvartal), kao i objedinjen Izvještaj o izvršenju Budžeta općine Zavidovići za 2020. godinu?

Odgovor na vijećničko pitanje (Odgovor je sačinjen na osnovu akta Službe za upravu ekonomskih poslova i poduzetništvo, broj: 03-45-17-170/21 od 26.05.2021. godine): Izvještaj o izvršenju Budžeta općine Zavidovići za period 01.10.-31.12.2020. godine (IV kvartal), bit će razmatran na 4. sjednici Općinskog vijeća Zavidovići, objedinjen Izvještaj o izvršenju Budžeta općine Zavidovići za 2020. godinu, biti će razmatran na 6. sjednici Općinskog vijeća Zavidovići.

Rokovi održavanja sjednica Općinskog vijeća su prolongirani zbog epidemioloških razloga.

2. Vijećnik Šimšić Igor: Šta su nadležni općinski organi i koje aktivnosti su poduzeli na otklanjanju negativnosti iz revizorskih izvještaja naše jedinice lokalne samouprave i u kolikom obimu su relizovane date revizorske preporuke koje je imala Općina Zavidovići?

Odgovor na vijećničko pitanje: Planom aktivnosti na otklanjanju slabosti, neregularnosti i prekršaja identifikovanih u izvještaju o finansijskoj reviziji Općine Zavidovići za 2016. i 2017. godinu broj: 02-14-4252/17-AP-14 od 16.11.2018. godine određene su:

- Mjere za otklanjanje slabosti, neregularnosti, prekršaja i izvršenje preporuka,
- Općinske službe i organi zaduženi za izvršeje mjera i
- Rokovi za izvršenje mjera.

Stručna služba općinskog načelnika je 11.09.2020. godine pokrenula postupak prikupljanja izvještaja od općinskih službi i organa o izvršenju mjera iz navedenog Plana. Budući da Plan aktivnosti broj: 02-14-4252/17-AP-14 od 16.11.2018. godine obuhvata provođenje mjera do 31.12.2020. godine, Stručna služba općinskog načelnika će tokom 2021. godine ponovo zatražiti izvještaje od općinskih službi i organa o izvršenju mjera iz navedenog Plana, te izvršiti njihovu analizu i sumiranje i utvrditi stepen provođenja mjera za otklanjanje slabosti, neregularnosti, prekršaja i izvršenje preporuka. U skladu sa rezultatima analize i sumiranja izvještaja o izvršenju mjera dalje će se postupati spram slabosti, neregularnosti i prekršajima identifikovanim u izvještaju o finansijskoj reviziji Općine Zavidovići za 2016. i 2017. godinu broj: 07-14-2-19-1654-7/17 od 28.09.2018. godine.

3. Vijećnik Šimšić Igor: Kub vijećnika SDP BiH u OV Zavidovići je na Prijedlog Budžeta općine Zavidovići za 2021. godinu, u skladu sa svim propisanim procedurama uputio amandmane na isti. Isti nametnutim Budžetom nisu prihvaćeni. Zašto Općinski načelnik i općinske službe se nisu pismeno očitovale i zašto podnosiocu amandmana nije odgovoreno u bilo kom kontekstu na akt? To je i obaveza ali i lijep primjer korespondiranja u međusobnim odnosima?

Odgovor na vijećničko pitanje (Odgovor je sačinjen na osnovu akta Službe za upravu ekonomskih poslova i poduzetništvo, broj: 03-45-17-170/21 od 26.05.2021. godine): Budžet Općine Zavidovići za 2021. godinu, zbog epidemioloških razloga, proglašen je u skladu s Zakonom o principima lokalne samouprave u Federaciji Bosne i Hercegovine.

Zakonom o principima lokalne samouprave u Federaciji Bosne i Hercegovine nije utvrđena procedura podnošenja amandmana, tako da pri proglašenju Budžeta općine Zavidovići za 2021. godinu, amandmani nisu ni razmatrani.

4. Vijećnik Šimšić Igor: Molim za kratko obrazloženje enormnog smanjenja iznosa Transfera za razvoj poljoprivrede u Budžetu općine za 2021. godinu u odnosu na iznos istog Transfera prethodne godine. Prošle godine smo poticali poljoprivredne proizvođače od sjemena, prehrane, zaštitnih sredstava, do ...Pozivali na intenziviranje poljoprivredne proizvodnje, sada ta podrška izostaje, ostavljamo naše građane na pola posla, bez podrške u zaokruživanju cjelokupnog procesa proizvodnje?

Odgovor (e) na moje vijećničko pitanje pored usmenih dostaviti i u pisanoj formi.

Odgovor na vijećničko pitanje dostavit će se na narednoj sjednici Općinskog vijeća Zavidovići.

### 3. VIJEĆNIČKO PITANJE VIJEĆNIKA BULJUBAŠIĆ DEMIRA

1. Vijećnik Buljubašić Demir: Poštovani načelnice, poštovano radno predsjedništvo, poštovani građani opštine Zavidovići, sredstva informisanja, sve vas srdačno pozdravljam i selamim. Ja imam dva vijećnička pitanja.

Upućujem pitanje vezano za održavanje regionalnog puta R-466 Zavidovići - Kamenica - Ponijeri. Izuzev brojnih oštećenja klizišta, rupa na putu koje otežavaju svakodnevno odvijanje saobraćaja, održavanje puteva nije na nivou na kojem bi trebalo biti. Dosipanje bankina se ne vrši redovno, a mjestimična nivelacija asvalta i puta je čak 20 centimetara što je naročito problematično na krivinama i ulazima prema stambenim objektima, gdje može doći do oštećenja vozila. Košenje trave pored puta se ne obavlja pravovremeno, a što za posljedicu ima stvaranje niskog rastinja koje između ostalog stvara strah kod mještana od sakupljanja zmija. Koje su to ugovorene obaveze izvođača zaduženog za održavanje puteva, da li možemo zatražiti njihovo očitovanje o tome koliko često obavljaju aktivnosti na održavanju ovih puteva, kada su te aktivnosti posljednji put sprovedene? Također, da li možemo nadležnima uputiti apel za efikasniju kontrolu i monitoring i implementaciju ugovorenih obaveza vezanu za održavanje svih regionalnih puteva na području općine Zavidovići?

Odgovor na vijećničko pitanje (Odgovor je sačinjen na osnovu akta Službe za upravu ekonomskih poslova i poduzetništvo, broj: 03-45-17-170/21 od 26.05.2021. godine): Dana 25.05.2021. godine Vaše pitanje je prosljeđeno u nadležnost Kantonalnoj direkciji za ceste. Po prijemu odgovora isti će vam biti dostavljen.

2. Vijećnik Buljubašić Demir: I drugo **vijećničko pitanje** je da je Vlada Zeničko-dobojskog kantona za projekte obnove vanredno održavanje regionalnih cesta i mostova u 2019. godini planirala 1.624.900 konvertibilnih maraka, a jedan od devet planiranih projekata je izgradnja pješačke staze od mosta na 6 kilometru do Osnovne škole „Gostović“ u vrijednosti od 105.000, kao sanacija i modernizacija cesta sa izradom potpornih zidova u vrijednosti od 210.000 KM, sve na regionalnom putnom pravcu R-466 Zavidovići - Kamenica – Ponijeri. Kao što vidimo na terenu, do realizacije ovih projekata nije došlo. Da li općinski načelnik i općinske službe raspolažu informacijama, zašto nisu impementirani ovi projekti i šta se desilo sa planiranim sredstvima?  
Molim da pitanje prosljedite nadležnom ministarstvu ZE-DO kantona.  
Zahvaljujem.

Odgovor na vijećničko pitanje (Odgovor je sačinjen na osnovu akta Službe za upravu ekonomskih poslova i poduzetništvo, broj: 03-45-17-170/21 od 26.05.2021. godine): Dana 25.05.2021. godine Vaše pitanje je prosljeđeno u nadležnost Kantonalnoj direkciji za ceste. Po prijemu odgovora isti će vam biti dostavljen.

#### 4. VIJEĆNIČKO PITANJE VIJEĆNIKA MUJKIĆ RASIMA

1. Vijećnik Mujkić Rasim: Pozdravljam i selamim sve prisutne, načelnika, predsjednicu, Općinske vijećnike, predstavnike medija, kao gledaoce naše i građane naše. Htio sam da postavim pitanje. Pošto smo konstatovali u prethodnim sjednicama da na Krivaju nije moguće odraditi onaj kružni tok, pa smo onda konstatovali da će ići neki semafori, pa se to odvušlo daleko, pa me interesuje do kad ćemo mi građani koji gravitiramo tim mjestom biti taoci te raskrsnice? Tražim da se što prije uvede tu prisustvo saobraćajne policije koja će regulisat ujutro kad je najgušći saobraćaj u pola sedam do sedam i u tri do četiri. Takođe kako dolazi dijaspora, trebalo bi da se pojača prisustvo tih naših saobraćajaca kako ne bi bile da kažem duge kolone i duga čekanja.

Odgovor na vijećničko pitanje (Odgovor je sačinjen na osnovu akta Službe za upravu ekonomskih poslova i poduzetništvo, broj: 03-45-17-170/21 od 26.05.2021. godine): Dana 25.05.2021. godine Vaše pitanje je prosljeđeno u nadležnost Policijskoj stanici Zavidovići. Po prijemu odgovora isti će vam biti dostavljen.

2. Vijećnik Mujkić Rasim: **Drugo pitanje** sam htio da postavim: Most između Mjesne zajednice Mećevići i Dolina - Alići, interesuje me prvenstveno, bilo je planirano da se taj most zove Most Mjesne zajednice Mećevići i Dolina - Alići. Međutim, sad na kraju taj most se zove Most Dolina - Alići samo. Jer on s jedne strane povezuje Dolinu – Alići, s druge strane Mećevići ili da stavimo oba mjesta jer mještani se bune. Hoće da pišu peticiju. Mislim da bi trebalo ili da stavimo oba imena ili da nađemo adekvatan naziv tog mosta. Toliko.

Odgovor na vijećničko pitanje (Odgovor je sačinjen na osnovu akta Službe za upravu ekonomskih poslova i poduzetništvo, broj: 03-45-17-170/21 od 26.05.2021. godine): Novoizgrađeni kolsko-pješački most koji spaja naseljena mjesta Mećevići i Dolina – Alići zvanično nema ime. Sam projekta mosta je nosio naziv „Izgradnja novog pješačkog mosta u MZ „Dolina - Alići“ u Općini Zavidovići“, te je moguće da se kao radni naziv prilikom izgradnje i izvještavanja o istom nazivao „Most Dolina - Alići“.  
Utvrđivanje naziva ulica, trgova, mostova i drugih građevina je u nadležnosti Općinskog vijeća, te su Odlukom o utvrđivanju naziva ulica, trgova, mostova i drugih građevina („Službeni glasnik Općine Zavidovići“, broj: 4/2008) utvrđeni nazivi ulica, trgova, mostova i

drugih građevina, ali samo u urbanom području grada Zavidovići, dok mostovima i drugim građevinama u vanurbanom području nisu davana imena.

## 5. VIJEĆNIČKO PITANJE VIJEĆNIKA MUJANOVIĆ HARISA

Vijećnik Mujanović Haris: Poštovani sugrađani, mediji, predstavnici Opštine, kolege, sve vas srdačno pozdravljam. Imam jedno vijećničko pitanje i jednu inicijativu. Pitanje se tiče vodovoda Rasječenica, ono glasi: Da li nadležna služba Opštine Zavidovići može dati informaciju o vremenu, roku, datumu završetka projekta, te dana kada će mještani okolnih naselja Memići, Lug, Brezik, Sječce koji su stvarno u oskudnom stanju što se tiče vode, pogotovo u ovim toplijim danima. Da li možemo reći koji je to okvirno rok, datum, mjesec završetka da bi se mogli nadati korištenju tog vodovoda. Pošto imam određenih neslužbenih informacija, ljudi ne prate kako da kažem validna sredstva informisanja. Veoma nam je važno da imamo tu informaciju da li je to 1.7., 1.8., 1.9. kako bi se ljudi u datim mjestima mogli organizovati i kako bi imali pravu informaciju. To je što se tiče pitanja.

Odgovor na vijećničko pitanje (Odgovor je sačinjen na osnovu akta Službe za upravu ekonomskih poslova i poduzetništvo, broj: 03-45-17-170/21 od 26.05.2021. godine): Vodovod Rasječenica - Brezik predviđa snabdijevanje naselja u MZ Brezik, MZ Krivaja, MZ Krivaja - Smailbašići i MZ Pašin Konak. Sistem za vodosnabdijevanje pomenutih naselja se sastoji iz: 3 vodozahvata, glavnog dovoda od vodozahvata do sabirne komore i glavnog odvoda od sabirne komore do centralnog rezervoara, u dužini 7.403 m1, zatim distributivnih vodova sa hidrotehničkim objektima i sekundarne mreže.

Realizacija projekta: „Izgradnja vodovoda Rasječenica Brezik je planirana u dvije faze.

I faza obuhvata izgradnju vodozahvata, sabirne komore, glavnog dovoda i rezervoara zapremine  $V=2 \times 100 \text{ m}^3$ .

U toku je postupak dodjele ugovora o javnoj nabavci radova na završetku I faze (dovršetak glavnog voda u dužini 120 m1 i izgradnja bazena  $V=1 \times 100 \text{ m}^3$  i zatvaračke komore, bez fazonskih komada i vodnih armatura, zbog nedostatka finansijskih sredstava). Nakon odabira izvođača radova i zaključenja ugovora o izvođenju radova, planiran je završetak radova I faze gradnje, u roku od 60 radnih dana od dana zaključenja ugovora o građenju.

II faza obuhvata izgradnju distributivnih vodova sa hidrotehničkim objektima i sekundarne mreže, za koju je potrebno prethodno izraditi glavni projekt, riješiti imovinsko-pravne odnose, pribaviti građevinsku dozvolu za gradnju II faze, te obezbijediti finansijska sredstva za realizaciju od viših nivoa vlasti i iz Budžeta općine Zavidovići.

## 6. DOPUNSKO VIJEĆNIČKO PITANJE VIJEĆNIKA FEHRIĆ ŠEMSE

Vijećnik Fehrić Šemso: Dopunsko vijećničko pitanje (U skladu sa članom 89, Poslovnika o radu OV):

Tražim informacije o saniranim klizištima na području općine Zavidovići od 2015. do 2020. godine, zajedno sa podacima o investiciono-tehničkoj dokumentaciji po kojima su izvedeni radovi.

### Obrazloženje

Molim da se dostavi informacija o pojedinačno saniranim klizištima na području općine Zavidovići od 2014. do 2020. godine, sa podacima o utrošenim sredstvima po pojedinačnim klizištima, te da se za ta sanirana klizišta priloži kopija investiciono-tehničke dokumentacije koja je pribavljena da bi se klizište saniralo, kao i informaciju ko je tu investiciono tehničku dokumentaciju pribavio;

Odgovor na vijećničko pitanje (Odgovor je sačinjen na osnovu akta Službe za upravu ekonomskih poslova i poduzetništvo, broj: 03-45-17-170/21 od 26.05.2021. godine): Izvođenje radova na sanaciji klizišta je izvršeno prema projektno-tehničkoj dokumentaciji na nivou Elaborata i Glavnog projekta sanacije. Sanacija klizišta manjeg intenziteta i obima je rađena prema Elaboratu koji su sačinila stručna lica Službe za upravu ekonomskih poslova i poduzetništva, a sanacija klizišta većeg intenziteta gdje je bila neophodna izrada Elaborata o geomehaničkom ispitivanju tla je rađena prema Glavnom projektu.

U tabelarnom pregledu dostavljamo Vam pregled saniranih klizišta koje je provela Služba za upravu ekonomskih poslova i poduzetništva:

Redni broj	Klizište	Utrošena sredstva za sanaciju klizišta	Nivo izrade tehničke dokumentacije	Projektant
<b>Sanacija klizišta u 2014. godini</b>				
1.	Sanacija klizišta Bajvati	23.101,40	Elaborat	Služba
2.	Sanacija klizišta na Vučjaku ("stari" put za Skroze)	11.758,82	Elaborat	Služba
3.	Sanacija klizišta na dijelu lokalnog puta Dolac-Rujnica	20.951,95	Elaborat	Služba
4.	Sanacija klizišta u Bajvatima (prema džamiji)	70.634,36	Elaborat	Služba
5.	Sanacija klizišta na "Sutjesci"	16.671,17	Elaborat	Služba
6.	Sanaciji klizišta na lokalnoj cesti 8. km - Mahoje, lokacija Lijevča - Bajvati	19.686,88	Elaborat	Služba
7.	Sanaciji klizišta na lokalnoj cesti Zavidovići - Paravci	24.362,50	Elaborat	Služba
<b>Sanacija klizišta u 2015. godini</b>				
1.	Sanacija klizišta na nekategorisanom putu Hrkići - Karalići	21.451,83	Elaborat	Služba
2.	Sanacija klizišta u Krčevinama	64.052,89	Glavni projekat	"Winner Projekt" d.o.o. Sarajevo
<b>Sanacija klizišta u 2016. godini</b>				
1.	Sanacija klizišta u Sinanovićima	19.972,06	Elaborat	Služba
2.	Sanacija klizišta na lokaciji Brijeg	10.800,27	Elaborat	Služba
3.	Sanacija klizišta na lokaciji Krajnići	15.365,61	Elaborat	Služba
4.	Sanacija klizišta na lokaciji Borovnica	12.104,82	Elaborat	Služba
5.	Sanacija klizišta na lokaciji Kuvelj	8.797,82	Elaborat	Služba
6.	Sanacija klizišta na lokaciji Mustajbašići	15.795,00	Elaborat	Služba
7.	Sanacija klizišta na lokaciji Osječani	17.173,26	Elaborat	Služba
<b>Sanacija klizišta u 2017. godini</b>				
	-----			
<b>Sanacija klizišta u 2018. godini</b>				
1.	Sanacija klizišta Brezik - Lug	24.100,68	Elaborat	Služba
2.	Sanacija klizišta Laz -Podovi	7.668,18	Elaborat	Služba
3.	Sanacija klizišta Skroze - Stavci	25.202,57	Elaborat	Služba
4.	Sanacija klizišta Skroze - Stavci1	15.400,90	Elaborat	Služba
5.	Sanacija klizišta naselje Vučjak	11.499,19	Elaborat	Služba
6.	Sanacija klizišta Omećak	111.150,00	Glavni projekat	Građevinski fakultet u Sarajevu- Institut za geologiju

U toku 2019. i 2020. godine Služba za upravu ekonomskih poslova i poduzetništva nije vršila sanaciju klizišta.

## 7. VIJEĆNIČKO PITANJE VIJEĆNIKA POLIĆ AJDINA

Vijećnik Polić Ajdin: Ovom prilikom isto postavljam vijećničko pitanje: Zašto fontana na šehidskom spomeniku nije u funkciji, te dodatno pitanje: U čijem je vlasništvu poslovni prostor bivše Turističke agencije ili zajednice u ulici „Alije Izetbegovića“? Hvala.

Odgovor na vijećničko pitanje: Fontana koja se nalazi na Spomniku žrtvama odbrambeno-oslobodilačkog rata 1992. – 1995. godina nije u funkciji zbog kvara na pumpi za vodu. Pokrenute su aktivnosti na nabavci nove pumpe koja će imati bolje karakteristike od postojeće, jer zbog nedovoljne snage postojeće pumpe često se javljaju kvarovi na istoj. Poslovni prostor u ulici „Alije Izetbegovića“ lamela I, preizemlje, naselje „Centar“ u kojem je bila smještena ispostava Turističke zajednice Zeničko-dobojskog kantona u vlasništvu je i posjedu Općine Zavidovići. Trenutno se vodi sudski postupak za podrumске prostorije koje pripadaju ovom poslovnom prostoru koje prema našem mišljenju drži u posjedu vlasnik susjedne prostorije.

S poštovanjem

PO OVLAŠTENJU OPĆINSKOG  
NAČELNIKA broj: 02-05-4/17-AP-73  
od 03.10.2017. godine  
SEKRETAR OPĆINSKOG  
ORGANA DRŽAVNE SLUŽBE

Dostavljeno:

1. Naslovu,
2. U spis.

Nermin Čahtarević, dipl. pravnik